

I o raklo phenela pe romnyake:

– Mo dad bichhalela man te bitinyarav mo metepi, zanayati te lav. Me me dadeskoro lafi duy nashti kerava. Me kato prandisalilyom ov miro lafi na chhindzhas, me da akana trebe te shunav les. Ka beshes pash lende, ola ka arakhen tut. Nanay te daras. Bitinyardzhom li mo metepi, birden ka avav mange pash tute.

I oy da, dimi, but dehala les, phenela:

– Zha! Me ka beshav pash lende zhi kana ka avel o vakuti! Samo te oves sasto-vesto, mangava!

Tsidindzhas o raklo akana. Sare leskere manusha bichhalena les, a ov si peske rahati – zhanela kay pash pe dayate, pe dadeste pe romnya mukela. A ola hohavena les. Nashalkerena e rakles dur atar o kher, te ipalen e chore chhaya. Ov zhala, ola ipalena la atar o kher. Chhivte la sar melali tsitsayori avri, a oy uli khamni. So te kerel i chhayori? Katka phirela, kutka phirela, nanay kon te pribirinel la. Kate te zhal?

Pale, kato barilo o per da lakoro, geli pale pash pe sasate, thay pash pe sastreste i molinela pes veche:

– Molinava man tumenge! Khamni sinyom. Pribirinen man ko kher te byanav me chhavoresh barem, sora so mangena keren! Ako mangena pale ipalen man! Ama, ake me chhaves nanay kate te byanav, ko droma phirava.

– Dikhen la! – phendzhas i sasuy. – Kayka so si biakhalyardi! Pale ali mange, te tukhtinel pes me khereste. Te phages to shoro akatar birden! Ma avay mange po-but athe! Alyan li da ekhvar, ka mudaras tut!

Marena la i ipalena e chhaya. I oy nanay kate te zhal, zhala ekhe krwchmate garavela pes. Darala o mate te na han pes lasa. Iklyola avryal i chuka palal ki krwchma garavela pes, khay othe te sovel. Kobor pashlili chhe, phenorye, astarena la o dukha. I, ama dimi, shunela o sesya e matengere i darala mi chhayori, ka nashel, po-dureste ka zhal. Kalyona lakere yakha i phenela:

– Me kate ka zhav te byanav? Ake mate manusha! Nanay kate te byanav. Me rezili ka ovav ko droma te byanav. Mange – phendzhas – zhivotos nanay. Mo chhavo da, choro ka achhol. Ach te zhav te chhivav man telal ki mashina, te mudarav man. Soske me da, mo chhavo da, te phiras ko droma?

I zhala karik ki mashina, te mudarel pes. Dukhentsa, roymasa, zhala zhi othe. Taman geli i pashlili ki liniya, i mashina garek upral avela.